

بِسْمِ اللَّهِ الرَّحْمَنِ الرَّحِيمِ

# KHUTBA JUMMAH

HAZRAT MUHYI-UD-DIN AL-KHALIFATOULLAH

*Munir Ahmad Azim*

05 Juin 2015 ~  
(17 Shabaan 1436 Hijri)

**(Résumé Khutba)**

**Après ki li fine salué tous so bane disciples (et tous bane musulmans) du monde entier par « Assalamoualaikum Warahmatullah Wabarakaatuhu » Hazrat Muhyi-ud-Din fine commence so Khutba Jummah avec Tashahhud, le Ta'ouz, Surah Al Fatiha, et ensuite li fine dire:**

## LE MOIS DE SHABAAN ET CONCEPTE DE SHABE-BARAAT

*Alhamdulillah, Summa Alhamdulillah*, dans moine se ki deux semaines, nous pou ene fois de plusse *Insha-Allah* bénie par l'arrivée mois Ramzaan, le mois d'Allah, kot Allah fine ordonne tous So bane serviteurs ki soumette à Li pou garde Roza (jeûne/carême) et pou consacrer zot dans So *Zikr* (mazine Allah) plisse ki dans tous bane les autres mois afin ki zot capave gagne So miséricorde et vine pli près avec Li (Allah).

Couma zot conné, avant mois Ramzaan, ena le mois de Shabaan ki nous pé vivre actuellement et ki aussi ene mois important dans la vie d'ene musulman. Hazrat Abdul Qadir Jilani (ra) fine ene fois décrire bane lettres formant le mot *Shabaan* comme suite:

1. *Sheen* pour *Sharaf* - Respect
2. *'Ayn* pour *'Oulou* - Élévation
3. *Baa* pour *Bir* - Bonté
4. *Alif* pour *Ulfat* - l'Amitié
5. *Nun* pour *Nur* - Lumière.

C'est dans le mois de Shabaan, le huitième mois de calendrier islamique ki nous bien-aimé Saint Prophète Hazrat Muhammad (saws) ti ena l'habitude pou prépare li physiquement, moralement et spirituellement pour accueillir mois de Ramzaan. Fine rapporté ki Hazrat Muhammad (saws) fine dire: « *Beaucoup dimounes pas conscients l'importance de sa mois là; li trouve entre Rajab et Ramzaan. Dans sa mois là, bane actions de bane dimounes élevé ziska le Maître de bane les*

*mondes (Allah). Mo oulé ki mo bane actions élevé pendant ki mo dans ene l'état de jeûne ».*  
(Nasaï)

Imam Bukhari rapporté dans so livre Hadiths ene réci de Hazrat Aisha (ra) kot li fine dire: « *Rassoollullah (saws) ti ena l'habitude garde Roza ziska ki nous ti pensé ki jamais li pou casse so Roza, et ti arriver ki li ti pas ti pé garde Roza ziska ki nous ti croire ki jamais li pou garde Roza. Jamais mo fine trouve Rassoollullah (saws) garde Roza pendant ene mois complète, excepté dans mois Ramzaan, et jamais mo fine trouve li garde Roza aussi frékaman ki dans (mois) Shabaan. »*

Li déconseillé pour ene musulman pou accueillir Ramzaan en gardant Roza le dernier jour ou les deux derniers jours de Shabaan. Hazrat Abu Huraira (ra) fine rapporté ki le Messager d'Allah (saws) fine dire: « *Pas garde Roza ene ou deux jours avant Ramzaan, exception faite pour celui ki ena l'habitude garde Roza ; dans sa cas là, li capave garde Roza. »* (Boukhari)

Sa hadith là donne nous notion pou distingue ene action obligatoire d'ene action volontaire, parski dans ene l'autre Hadith ki trouve dans Sunan Nasaï et rapporté par Hazrat Ummé Salama (ra), fine rapporté ki le Prophète (saws) pas ti pé garde Roza pour ene mois complet de l'année, sauf Shabaan et li ti ena l'habitude joinde li ensam avec Ramzaan. Sa veut dire ki comme ene dimoune ki ena l'habitude garde Roza lors ene base régulière, ti pé arrivé aussi ki le Saint Prophète Muhammad (saws) aussi ti pé garde Roza et joinde sa bane Roza dans Shabaan là avec bane premiers et lé reste de bane jours de Ramzaan, ou sois li ti pé préfère quelques fois pour pas garde Roza dans bane derniers jours de Shabaan et ti pé garde Roza seulement dans mois Ramzaan, parski garde Roza dans mois Shabaan pas ti ene acte obligatoire, mais pluto li fine fer li lors ene baze volontaire. Mais seulement, li ti pé content pour honore mois Ramzaan en commençant bane préparatifs pour Ramzaan dans mois Shabaan même. (An-Nasaï)

En plisse de garde Roza, Nabi Kareem (saws) ti ena l'habitude maximize so létemps dans bane Namaz (*Salaat*) Nafil, bane *duahs* et *Zikrullah*. En plisse de sa, dans plusieurs de bane ahadiths, mais pas dans bane livres de Hadith ki considéré comme Sahih et populaire, fine rapporté ki Hazrat Muhammad (saws) fine donne l'importance la nuite de mi-Shabaan (15<sup>ème</sup> Shabaan).

Hazrat Aisha (ra) fine rapporté: « *Rassoollullah (saws) fine diboute dans Namaz pendant ene partie de la nuit et fine faire so prosternation (Sijda) tellement longue ki mo fine pensé ki li fine fini rende l'âme (c'est-à-dire, mort). Kan mo fine trouve sa, mo fine levé et mo fine alle bouze so gros orteil; après quoi li fine bouzé, donc mo fine rékilé. Kan li fine lève la tête après prosternation et fine fini prier, li fine dire: « Ô Aisha, Ô celui ki rousse (Humayra)! Eski to pensé ki le prophète fine casse so l'engagement avec toi ? » Li fine réponde: « Non, par Allah, Ô Messager d'Allah, mais mo fine pensé ki to fine rende l'âme, vu ki to fine reste dans Sijda pendant si longtemps. » Li (saws) fine dire : « Eski to conné ki la nuite été sa ? » Li fine réponde: « Allah et So Prophète conne mieux. » Li (saws) fine réponde: « Sa c'est la nuite de mi-Shabaan! En vérité, Allah le Glorieux et Majestueux observe So bane serviteurs dans la nuit de mi-Shabaan, et Li pardonne à bane ki demande pardon, et Li accorde miséricorde à bane ki demande miséricorde,*

*et Li donne ene délai à bane dimounes jaloux et ki garde rancune dans zot l'état ki zot été.»*  
(Baihaqi)

Bien ki pas ena aucaine doute ki l'importance mois Shabaan li incontestable dans l'histoire de l'Islam, mais tout au long de bane siècles, bane innovations fine glissé dans bane l'enseignements pures de l'Islam et Sounna du Saint Prophète Hazrat Muhammad (saws), plus précisément concernant mi-Shabaan (15<sup>ème</sup> Shabaan) kot bane dimounes pas fine même hésité pou exagère so l'importance, plisse ki nécessaire. *Ibaadat* ki Hazrat Muhammad (saws) ti pé fer pas ti limité seulement à 15<sup>ème</sup> Shabaan. Pas ena aucaine forme spécifique de *Ibaadat* ki prescrire pour sa la nuit là. Pas ena aucaine *Salaat* spécifique ki prescrire pour sa la nuit là. Mais certains savants et Mujaddids de l'Islam fine recevoir bane signes d'Allah pendant la nuit de 15<sup>ème</sup> Shabaan.

**Ene l'exemple:** C'était pendant sa la nuit là ki Hazrat Umar ibn Abdul Aziz (ra) après ki li fine termine so bane *Ibaadat*, ki li fine trouve ene boute papier couleur vert. Ene la lumière ti pé sorti de sa boute papier là et ti pé perce lé ciel et fine écrire lors là ki sa vine de la part d'Allah à So serviteur Umar ibn Abdul Aziz (ra), et fine donne li garantie ki li pou gagne le salut de bane flammes de l'enfer.

Même si la nuit de mi-Shabaan capave rempli avec bane bénédictions et même si le Saint Prophète de l'Islam (saws) ti reste éveillé sa la nuit là dans *Ibaadat*, toutefois c'est ene malentendu entre ene section de la communauté musulmane (l'*Ummah*) pou affirmer ki bénédiction de mi-Shabaan fine mentionné dans pas autre ki le Quran Shareef, dans chapitre 44, *Ad-Dukhan*. Zot cite sa verset suivant là pou montrer ki la nuit béni ki mentionné dans sa verset là li fer référence à la nuit de mi-Shabaan, et sa pas vrai du tout.

Allah dire:

**« Par le Livre claire! En vérité, Nous fine fer li dessane pendant ene la nuit béni parski Nous pas arrête averti bane dimounes ! C'est au cours de sa la nuit là ki tout décision sage prend, en vertu d'ene l'ordre ki vine de Nous...»** (Ad-Dukhan 44: 3-6)

Quand nous étudier Quran, nous trouvé ki Allah fine déjà mentionne dans So Quran Shareef, dans Chapitre 2 ki le Quran Shareef fine révélé pendant mois Ramzaan, et donc « *Lailatul Mubarak* » pas capave fer référence à la nuit de 15<sup>ème</sup> Shabaan mais en vérité li fer référence à *Laila-tul-Qadr*, la Nuit du Décret, sa même la nuit béni (ki mentionné dans chapitre 97 Al-Qadr) kot le Quran ti révélé et sa aussi plus précisément pendant mois sacré de Ramzaan.

En plisse de sa, comme rapporté dans Sunan Nasai, Hazrat Muhammad (saws) fine dire: «...Dans sa mois là, bane actions de bane dimounes élevé ziska le Maître de bane les mondes (Allah). Mo oulé ki mo bane actions élevé pendant ki mo dans ene l'état de jeûne » Ici, Hazrat Muhammad (saws) pas fine mentionne ene la nuit en particulier, mais plutôt tout le mois de Shabaan kot

bane actions de bane dimounes zot arrive à Allah, et donc c'est pourquoi Hazrat Muhammad (saws) ti pé préfère ki so bane actions présenté devant Allah dans ene l'état kot li pure et agréable à Allah, parski récompense pour Roza c'est Allah Li-même.

En plisse de sa, coutume ki astaire bane musulmans ena pou cuit ene manzé spécifique (en l'occurrence, *Halwa-Roti*) pour 15<sup>ème</sup> la nuit Shabaan ou sa croyance ki zot ena là ki connexion avec bane morts li ouvert dans sa la nuit là, et le jour suivant, li pas ena aucaine fondement ni dans Quran ni dans Sunnah de Hazrat Muhammad (saws). Ni aussi sa bane croyance ki bizin allume la lampe ou illumine l'extérieur de bane Masjids ki pratiqué par certains dimounes ziska ce jour.

Li ti ene pratique noble de Rassoollullah (saws) pou consacrer li dans *Ibaadat* durant dernier partie de sak la nuit. So *Ibaadat* pas ti limité à seulement 15<sup>ème</sup> Shabaan ou kit autre la nuit spécifique. Hazrat Aisha (ra) fine rapporté ki Hazrat Muhammad (saws) ti ena l'habitude pour alle dormi pendant premier partie de la nuit et li ti pé reste éveillé pendant dernier partie de la nuit (kot li ti pé dépense sa lé temps là dans *Ibaadat*). (Bukhari & Muslim)

Allah (swt) déssane vers lé ciel ki pli proche durant dernier tier de sak la nuit. (Bukhari). Sa li pas réservé seulement à 15<sup>ème</sup> la nuit Shabaan. Et visite cimetièrre li pas ene caractéristique particulier de sa la nuit là; fine prouvé par d'autres réci authentiques ki Hazrat Muhammad (saws) ti pé alle dans cimetièrre pour faire *duah* pendant dernier partie de plusieurs la nuite.

Faire attention (mo pas pé condamne sa), li pas du tout ene péché pour faire beaucoup de duahs et de Namaz et même pou garde Roza, que soit bane Namaz obligatoires (*Farz*) ou volontaires (*Nafil*) au cours de la nuit de mi-Shabaan, ou même tout au long mois Shabaan, mais li ene péché pou ajoute bane innovations à bane l'enseignements du Saint Prophète Muhammad (saws) et pou attribuer à so bane pratiques saki li pas fine faire ou ordonner pou faire.

Li très regrettable ki nous bane frères et sœurs de même la foi ki nous, étant musulmans zot même et ki croire dans Shahada: *Laa-Ilaaha Illallah Mohammadur Rassulullah* fine tourne en bas là-haut bane pratiques de nous bien-aimé prophète Hazrat Muhammad (saws) et afin pou rende crédible zot propres croyances, zot cherche invente bane telles pratiques ki en dehors de cadre de l'Islam. Si le Saint Prophète Muhammad (saws) ti vraiment conne bane bénédictions spéciales de mi-Shabaan et ti faire beaucoup *Ibaadat* par la suite, alors sa pratique là bane dimounes ki dire ki zot musulmans là fine exagère sa et fine tourne sa bane l'enseignements et pratiques là en bas là-haut kan zot fine mette zot bane propres l'opinions de l'avant, et kot zot fine même fer référence au fait ki sa la nuit là li vaut plisse ki la Nuit du décret (*Laila-tul-Qadr*) ou bane jours de mois Ramzaan, et alors de sa façon là zot fine établir ene telle l'école de pensée dans l'Islam ki contredire bane l'enseignements fondamentales de l'Islam.

Allah juge So bane serviteurs en fonction de zot bane bons l'intentions. Bane ki cherche Li vraiment, alors ki Allah pardonne zot et envoie So miséricorde pleinement lors zot, et rende zot

soumi à Li. Et meilleur l'exemple ki fine honore sa le monde là avec so présence c'est nul autre ki sa meilleur être humain ki ti vini pour enseigne nous vrai valeur de la religion et pou montrer nous bane chemins et bane moyens pour accède à Allah. Et li fine aussi montrer nous couma pou débarrasse nous de tous bane mals sataniques ki rode vine dans nous chemin afin pou rende chemin là travers, afin pou fer nous bane actions et pensées concorder avec celui de Shaytane, et non pas de Allah (twa).

Ki Allah protège nous contre toute sorte kalité mauvais innovation ki capave révèle fatale pour nous la foi en tant ki musulmans. Et ki Allah accorde nous refuge dans So miséricorde et donne nous le *Tawfiq* pour gagne bane bénédictions divines de mois Ramzaan ki pou vini bientôt, avec ene la foi sain kot na pas ena aucaine l'influence Shaytane. *Ameen, Summa Ameen, Ya Rabbul Aalameen.*

### **NOMINATION DR. BIBI AMINA GURIB-FAKIM AU POSTE DE PRESIDENTE DE LA REPUBLIQUE**

Dr. Bibi Amina Firdaus Gurib-Fakim prête serment comme présidente de la République azordi Vendredi le 05 Juin 2015 et hier ti ena ene session parlementaire convoqué par le Premier Ministre Sir Aneerood Jugnauth à 11.20am pour faire élire Dr. Bibi Amina Firdaus Gurib-Fakim comme présidente de la République, et li fine élire à l'unanimité.

En mo nom personnel et le nom du Jamaat Ul Sahih Al Islam National et International, nous félicite li. Ki Allah aide li dans so travail et par so façon ki li pour servi le pays, à travers sa li pour montré l'Islam so l'enseignement avant tous. *Insha-Allah.*

Le poste en li même c'est ene l'honneur pour sa le monde là, mais *Insha-Allah*, Allah (swt) donne li la capacité pour azir comme ene croyante avant tout. Faudé pas ki sa poste là faire li oublié bane l'enseignements de l'Islam kot bizin mette li en pratique et faudé ki sa pas vine ene déshonneur divant le Créateur. Sa veut pas dire à cause nous pé vivre dans ene pays non-Musulman nous bizin alle à l'encontre l'enseignement Quran et le prophète Muhammad (saws). Bien au contraire nous bizin donne les autres leçons lors la beauté de l'Islam en préservant la dignité de la femme. Donc, demain si ena désobéissance Allah, ki sanlà so lédo large pour sarryé sa responsabilité là ? Désobéissance envers le Créateur pour ena kan il s'agit de la mixité. Le message Quran claire, co-opéré dans le bien mais pas co-opéré dans le mal.

Même ki nous conné ki le poste chef d'état c'est ene poste ki nous ena tous respé et ki péna aucaine pouvoir mais, touzour, li ene poste président sans pouvoir. Nous souhaité ki nous sœur Gurib-Fakim réfléchi lors so poste ki à partir aujourd'hui li pou occupé ! Ki meilleur ? L'obéissance envers le Créateur et So Prophète (saws) ou au Gouvernement de l'île Maurice et au Premier Ministre. Donc, l'avenir pour dire nous. *Insha-Allah*, nous faire duah pour li ki li faire so travail d'après bane l'enseignement divine. *Ameen.*